

無盡意菩薩經

第二

百一
周十

47788
4




元祿九年丙子二月日重脩

皇圖聖圖 帝藩銀昌

佛日增輝 機輪常轉

山城州天安寺法金剛院置



無盡意菩薩經卷第三

周

宋涼州沙門智嚴共寶雲譯

尔時無盡意菩薩復語舍利弗菩薩修慈亦不可盡何以故菩薩之慈無量無邊是修慈者無有齊限等衆生界菩薩修慈發心普覆舍利弗譬言如虚空無不普覆是菩薩慈亦復如是一切衆生無不覆者舍利弗如衆生界無量無邊不可窮盡菩薩修慈亦復如是無量無邊無有窮盡虚空無盡故衆生無盡衆生無盡故菩薩修慈亦不可盡是謂大士所修慈心不可得盡舍利弗言善男子齊幾名衆生界無盡意言所有地界水火風界其量

無邊而猶不多於衆生界舍利弗言惟善男子頗可得說譬喻比不無盡意言可說但不得以小事爲喻舍利弗東方去此盡一恒河沙佛之世界南西北方四維上下皆一恒河佛世界作一大海其水滿溢使一恒河沙等諸衆生聚集共以一毛破爲百分以一分毛滴取一滴如是一恒河沙共取一滴二恒河沙共取二滴如是展轉乃至滴大海水如盡是衆生界猶不可盡菩薩慈心悉能徧覆是衆生舍利弗於意云何是修慈善根豈可盡耶舍利弗言實不可盡惟善男子是虛空性尚可得盡菩薩慈心不可盡也若有善

薩聞作是說不生驚怖當知是人得無盡慈
舍利弗是慈能自擁護己身是慈亦能利益
他人是慈無諍是慈能斷一切瞋恚荒穢繫
縛是慈能離諸結及使是慈歡喜是慈不見
一切衆生破戒之過是慈無熱身心受樂是
慈遠離一切惱害是慈能離一切怖畏是慈

能順衆聖人道是慈能令瞋者歡喜是慈能
勝一切鬪諍是慈能生利養稱歎是慈莊嚴
釋梵威德是慈常爲智人所讚是慈常護凡
夫愚人是慈常能隨順梵道是慈不雜遠離
欲界是慈能向解脫法門是慈能攝一切諸
乘是慈能攝非財功德是慈長養一切功德

是慈過諸無作功德是慈悉能莊嚴相好是
慈能離下劣鈍根是慈能開天人涅槃諸善
正道是慈能離三惡八難是慈愛樂諸善法
等是慈如願一切所欲成就自在是慈平等
於諸衆生是慈發行離諸異相是慈正向持
戒之門是慈能護諸犯禁者是慈能成無上
忍力是慈能離諸慢放逸是慈發起無諍精
進入於正道是慈根本入聖禪定是慈善能
分別於心離諸煩惱是慈因慧而生揔持語
言文字是慈定伴離魔結伴是慈常與歡喜
同止是慈善爲心之所使是慈堅持威儀戒
法是慈能離諸調動等是慈能滅種種諸相

是慈善香慙媿塗身是慈能除煩惱臭氣舍
利弗無修慈者悉能擁護一切衆生能捨己
樂與他衆生聲聞修慈齊爲己身菩薩之慈
悉爲一切無量衆生舍利弗無修慈者能度
諸流慈所及處有緣衆生又緣於法又無所
緣緣衆生者初發心也緣法緣者已習行也
緣無緣者得深法忍也舍利弗是名菩薩修
行大慈而不可盡

復次舍利弗菩薩摩訶薩修行大悲亦不可
盡何以故舍利弗如人命根即以出息入息
爲本菩薩如是修學大乘以大悲爲本如轉
輪聖王以輪寶爲本菩薩如是修一切智以

大悲爲本如大長者唯有一子愍愛情重菩
薩大悲亦復如是於諸衆生愛之若子如是
大悲我已行已如是大悲作已利已如是大
悲不假他事如是大悲已心所作出不諂曲
如是大悲所作畢竟出正決定如是大悲種
性所作出於直道如是大悲心無邪曲出生
正直如是大悲無有憍慢出衆生境如是大
悲捐捨己身出如來身如是大悲不貪壽命
出不作惡如是大悲擁護衆生出於菩提如
是大悲護真實法出心清淨如是大悲見諸
窮厄出拔濟事如是大悲本誓堅固出不動
心如是大悲不欺己身人天賢聖出不虛誑

如是大悲其行清淨出於善業如是大悲自
捨己樂出與他樂如是大悲不與他苦出不
焦熱如是大悲能令衆生捨於重擔出堅精
進如是大悲有忍勢出護無力如是大悲
不厭可汗出瞻病者如是大悲得法自在出
教化鈍根如是大悲覆自功德出顯他功業
如是大悲出離諸苦如是大悲出求無漏樂
如是大悲出捨所愛物如是大悲出作衆善
業無所憍惱如是大悲出善持禁不捨毀戒
如是大悲出教化衆生如是大悲出不惜身
命如是大悲出捨自支節如是大悲出生他
善根如是大悲出自利益善根如是大悲出

無味諸禪如是大悲出不厭欲界如是大悲
出於觀慧如是大悲出不汙善根如是大悲
出諸衆生如所願成如是大悲出有爲無爲
如是大悲出不證無爲如是大悲出知衆生
性同無爲而能教化如是大悲出護發戒者
如是大悲出讚歎佛戒如是大乘諸悲出於
大悲以是因緣故名大悲謂大悲者必定善
行布施持戒忍辱精進禪定智慧諸助道法
爲得自然無師智慧營他衆生所作事業精
勤專著如修己務以是因緣故名大悲舍利
弗是名菩薩修行大悲而不可盡
復次舍利弗菩薩摩訶薩修行於喜亦不可

盡云何爲喜常念於法歡喜踊躍不生懈怠
無諸惱熱離五欲樂住於法樂心和悅豫身
輕柔軟意勤勸督識常生悲樂求如來無上
法身樂修相好以自莊嚴聽法無厭念行正
法行正法已心生歡喜生歡喜已具得法悲
常於衆生不生礙心以增上欲勤求於法生
欲法已深心得解甚深佛法遠離二乘發無
上心除諸慳惜發於捨心見來乞者心生歡
喜捨時歡喜施已無悔如是布施三時清淨
得清淨已心則悅豫於持戒者常行布施於
毀禁者喜心攝取自持禁戒心則清淨能令
惡道怖懼衆生得無所畏遠離惡處一心迴

向如來禁戒堅持牢固不可毀壞惡罵加已
堪忍不報於諸衆生心無憍慢於諸尊長謙
下恭敬言常和悅離於頻蹙先以愛語終無
諂曲不以邪心誘誑於人不以利養爲他執
役其心清淨無有麁過於諸不可不見其過
不求他短不舉人罪專心正念諸和敬法於
諸菩薩生如來想愛說法者重於己身愛重
如來如惜己命於諸師長生父母想於諸衆
生生兒息想於諸威儀如護頭首於諸波羅
蜜如愛手足於諸善法生珍寶想於教誨者
生五欲想於知足行生無病想愛樂求法生
妙藥想於舉罪者生良醫想攝御諸根無有

懈怠是故名喜是喜寂靜覺知微妙故是喜
寂滅無調慢故是喜行猗不戲論故是喜根
本心不亂故是喜多聞取善語故是喜平等
心柔軟故是喜勇猛善作業故是喜不悔專
行善故是喜正住不懈怠故是喜不動無所
依故是喜不共難摧伏故是喜實義不忘失
故是喜真實無變異故是喜誠諦如所作故
是喜能捨力堅牢故是喜大力無能勝故是
喜能作諸佛神力求諸佛法故舍利弗是名
菩薩修行於喜而不可盡

復次舍利弗菩薩摩訶薩修行於捨亦不可
盡云何菩薩修捨無盡菩薩行捨捨有三種云

何爲三捨諸煩惱捨護己他捨時非時去何
捨諸煩惱恭敬供養其心不高輕慢毀訾心
亦不下若得利養心不貪恃若遭衰惱心亦
不愁若遇譽讚心無喜慶若遭毀者心不退
縮若遇譏者心無虧蔽若有稱者善住法界
若遭苦事心力忍受若遇樂事明見無常放
捨所愛斷於瞋恚於親非親得平等心持戒
毀戒意無增減作善作惡無有二相於愛非
愛心無所著聞善不善心能堪忍於善惡語
心不繫著於味過患其量無二於諸衆生得
平等心於上中下得等光明不惜身命好惡
名聞同於法界於實相法心得清淨於世法

等得菩薩捨是名菩薩捨於煩惱云何菩薩
捨護己他若被割截身體支節心無瞋恨不
求讎報以得捨心故能捨二內外身口於此
二中不生諍訟於眼與色無有欲汙耳聲鼻
香舌味身觸意法亦復如是故於二中不生
諍訟是故名捨不傷不害是故名捨捨護己
他是故名捨於利非利心行平等是故名捨
於第一義不生諍論是故名捨於己心中善
能分別是故名捨觀捨己身是故名捨不害
他身是故名捨菩薩修捨於諸禪定常行捨
心諸佛出世尊不聽菩薩於諸衆生而行捨心
何以故菩薩常修精進爲護自他勤求善根

是名菩薩捨護己他去何捨時非時非器衆
生捨不引接衰毀譏苦捨而不愛捨求聲聞
成決定者行布施時捨修持戒修持戒時捨
於布施修忍辱時捨施戒進修精進時捨施
戒忍行禪定時捨於布施修智慧時捨五波
羅蜜所不應作終不復作如是諸法安住戒
行精勤勇猛具足修行是名菩薩修無盡捨
復次舍利弗菩薩諸通亦不可盡云何諸通
天眼通天耳通他心通宿命通如意通云何
天眼通菩薩天眼於諸天龍鬼神諸軋闍婆
學無學人聲聞緣覺所有天眼爲最第一微
妙殊勝開達明了向一切智功德所成不與

天龍二乘共之若有十方無量無邊諸佛出世
界所有形貌色像光明若麤若細若近若遠
菩薩天眼一切悉見照了分別善解善見亦
見其中所有衆生生諸趣者除無色天其餘
業行生死相續若業業果分別諸根悉知無
遺若於十方無量無邊諸佛出世所有莊嚴
淨妙國土悉見無餘如是見已清淨持戒願
以迴向莊嚴已土住是持戒如其所願悉得
成就無量大利菩薩天眼亦見其中菩薩大
衆修行於道身四威儀及正憶念得解脫法
安住揔持辯才方便入慧方便見已自修如
是諸行悉令備足是菩薩眼清淨無礙得見

色故是眼不汙不著色故是眼解脫遠離諸
見煩惱故是眼清淨性明了故是眼不依離
所緣故是眼不發斷煩惱故是眼無翳斷疑
網故是眼不起斷障礙故是眼得明照了法
故是眼念知不行識故是眼無貪瞋恚愚癡
能斷一切諸結使故是眼無上趣聖本故是
眼無礙平等光明照衆生故是眼無垢斷惡
法故是眼不染性清淨故是眼入佛眼畢竟
不捨故是眼不縛斷愛恚故是眼行義出於
真實修行念知淨道法故何以故是大士安
住大悲深解法相善分別義無有諍訟隨見
聞說皆不善法趣向道場心無障礙見慳惜

人能捨財施見毀禁者修持淨戒見瞋恚者修忍不諍見懈怠者攝取勸厲見散心者示諸禪枝無智慧者施與慧眼行邪道者亦以正道修下行者爲說甚深微妙佛法令入一切智不退諸通具足菩提舍利弗是名菩薩天眼神通而不可盡云何菩薩天耳神通若十方無量無邊諸佛世界所有諸聲所謂天龍鬼神乾闥婆阿脩羅迦樓羅緊那羅摩睺羅伽人非人聲及以聖聲所謂聲聞緣覺菩薩正徧知聲一切凡是耳根所對乃至地獄餓鬼畜生蠅蛾蚤蚋所有諸聲一切悉聞若諸衆生心所緣處若

善不善無記所作事業出諸音聲一切悉解
若口善業口不善業口無記業如是諸業悉
如實知若有口業因於愛欲說瞋說癡若有
口業因於瞋恚說欲說癡若有口業因於愚
癡說欲說瞋若因欲說欲因瞋說瞋因癡說
癡如是諸聲亦皆能知或有口業心淨口麤

或有口業口淨心麤或有口業口淨心淨或
有口業口麤心淨如是是一切無礙耳通能如
實知是菩薩天耳亦知聖聲及非聖聲若聞
聖聲不生愛著聞非聖聲心不生礙於聖人
聲得具大慈非聖人聲得具大悲若聞過去
未來諸聲得盡本際如實正智是菩薩天耳

得聞一切諸佛世尊所說妙法聞已憶念正
智揔持不忘不失隨衆生器而爲說法善知
諸法堅不堅相是菩薩若聽一佛說法不聞
餘佛所說法者無有是處一切諸佛所可演
說悉能聽受菩薩若聞善不善無記法聲皆
悉善知時與非時所謂若有衆時非說法時
聞已嘿然而無所說若有說時非有衆時所
謂正爲一人能堪受者是故雖說不爲一切
事若真實或畏傷他故不爲說事若不實爲
利益他以清淨心方便得說若所喜聲即能
得聞所不喜者便不復聞若於大衆爲諸衆
生演說法時隨其耳識所解所受是菩薩天

耳悉得聞。知若說法時。或有衆生應解悟者。便得聞法。不解悟者。則便不聞。是菩薩耳界。法界。其性清淨。知見我人衆生。悉清淨。故是菩薩。正分別耳界。如言語文字所說之相。若有五趣雜類衆生。隨其所解。言語音聲而爲說法。持是天耳。迴向如來所得耳界。不求餘乘。故舍利弗。是名菩薩。天耳神通而不可盡。復次。舍利弗。菩薩知他心通。亦不可盡。云何菩薩知他心通。若諸衆生。上中下心。菩薩悉知。知是衆生因施。根心相知。是衆生因戒。根心相知。是衆生因忍。根心相知。是衆生因進。根心相知。是衆生因定。根心相知。是衆生因

智根心相知是衆生因慈悲喜捨根心相知
是衆生因聲聞緣覺大乘根心相知是衆生
因力增上善根具足知是衆生因行增上善
根故得生此知是衆生其行清淨心不清淨
知是衆生其行不淨而心清淨知是衆生心
行俱淨知是衆生行之與心二俱不淨知是
衆生過去世心諸根行因知是衆生隨緣悟
法是名菩薩知他心智又復知他未來世心
知是衆生未來世中有持戒因現在世中有
布施因知是衆生未來世中有忍辱因現在
世中有持戒因知是衆生未來世中有精進
因現在世中有忍辱因知是衆生未來世中

有禪定因現在世中有精進因知是衆生未
來世中有智慧因現在世中行俗心因知是
衆生未來世中發大乘因現在世中有下根
因未來衆生有如是等諸因諸緣是諸因緣
能如實知是菩薩於未來受化衆生終不疲
厭如其心根如實能知隨其器量而為說法
若樂少聞則不多說說必有益功不唐捐是
名菩薩知他心智若現在世衆生所行心心
數法悉如實知所謂欲心如實知欲心離欲
心如實知離欲心恚心如實知恚心離恚心
如實知離恚心癡心如實知癡心離癡心如
實知離癡心散心如實知散心攝心如實知

攝心懈怠心如實知懈怠心精進心如實知
精進心下心如實知下心上心如實知上心
乱心如實知乱心定心如實知定心無解脫
心如實知無解脫心有解脫心如實知有解
脫心無寂靜心如實知無寂靜心有寂靜心
如實知有寂靜心量心如實知量心無量心
如實知無量心一一衆生一一煩惱纏覆心
者一切皆知如是知已如其出道而爲說法
又是菩薩所住之處先觀衆生知其根量隨
而爲說出要之法是諸衆生上中下根悉如
實知是菩薩心知他心時無有障礙何以故
是菩薩心智慧猛利善分別故念意進慧之

所知故善能解了菩提相故斷諸習氣故清
淨無垢故明了無諍故無諸煩惱故無有淵
流故照一切法故善入一切衆生心故能如
是解是菩薩心智猛利於如是法正入知者
是名菩薩他心智通而不可盡

復次舍利弗菩薩宿命智通亦不可盡云何
菩薩宿命智通是菩薩念宿命事若自若他
善受憶持安住法界無有傾動無傾動者能
善解了善作業故是念無惱安住禪定故是
念無畏善攝智慧故是念不從他求現得善
知故是念正憶畢竟不失故是念助功德善
解大乘故是念助智不從他具足故是念善

根諸波羅蜜具足能到一切佛法故是宿命
智若念一生二生三生四生五生十生二十
生三十生五十生乃至百生千生百千生無
量百生無量千生無量百千生及天地成壞
無量成世無量壞世無量成壞世無量成壞
劫知諸衆生於是中生如是種姓如是名字
如是色像如是飲食如是壽命受苦樂等於
是中死還是中生於彼中死還彼中生是菩
薩念如是等無量生死自念宿世及他衆生
盡過去際是菩薩念自善根迴向阿耨多羅
三藐三菩提念他善根願令發阿耨多羅三
藐三菩提心是菩薩以正念心於本生死行

苦善觀無常苦無我若觀無常苦無我者於
諸色欲封祿壽命眷屬自在悉無貪著亦復
不貪釋梵護世轉輪聖王及受生處五欲歡
樂為化眾生故現受生是菩薩念於無常苦
無我已過去穢行發露懺悔現世諸惡乃至
失命終不為之過去善根欲令增廣迴向阿
耨多羅三藐三菩提現在善根與眾生共迴
向阿耨多羅三藐三菩提是菩薩離諸惡願
不斷三寶種故所有善根悉已迴向阿耨多
羅三藐三菩提舍利弗是名菩薩念宿命智
而不可盡

復次舍利弗菩薩摩訶薩如意神通亦不可

盡云何菩薩如意神通若欲進心慧所攝諸
法調伏柔和心得自在善修集故現在能得
是如意通是菩薩作種種神通變化以是神
通爲化衆生是菩薩一一示現種種神通教
化衆生所謂若色相若力勢若變化是菩薩
色像若緣覺色像若聲聞色像若釋梵護世
示種種色相令衆生見見已心伏所謂若佛
轉輪聖王色像及餘種種無量色像乃至示
現畜生色像化衆生故作是示現示現是已
隨其所應而爲說法若有衆生自謂已身有
大勢力而起憍慢瞋恚貢高菩薩欲爲調伏
如是諸衆生故示現大力所謂示現那羅延

力四分之一或四分之二或四分之三或令
示現須彌山王高十六萬八千由旬縱廣八
萬四千由延以三指舉擲置他方無量世界
譬言如擲一阿摩勒菓於菩薩力而無損減斷
取三千大千世界下盡水際以手舉之高至
有頂住經一劫菩薩成就示現如是大勢力
時能令如是瞋恚憍慢貢高衆生內善調伏
知調伏已然後隨應而爲說法是菩薩修如
意通能得智慧變化勢力以變化力諸所欲
作悉得成就變大海以爲牛跡大海不小
又變牛跡以爲大海牛跡不大若劫欲盡火
災起時欲變爲水能如意變水災起時能變

爲火風災起時能變爲火火災起時能變爲風風災起時能變爲水水災起時能變爲風如是變化皆悉成就若上中下法隨意變化惟除諸佛更無有人能移動留礙破壞菩薩如意神通所謂釋梵天王魔王波旬及其眷屬是菩薩作種種變化示諸衆生令歡喜已然後隨意而爲說法是菩薩神通勇健自在能過諸魔煩惱境界入於佛界不惱衆生所有善根皆悉成就一切魔衆無能斷者舍利弗是名菩薩如意神通而不可盡復次舍利弗菩薩四攝亦不可盡去何爲四一者布施二者愛語三者利行四者同利去

何布施施有二種財施法施去何愛語於求財人及聽法者柔和與語去何利行於求財人及聽法者隨其所求悉令滿足去何同利求財法者以大乘已利令彼安止又復施者見諸乞求心生清淨愛語者於諸乞士心生歡喜利行者於諸乞士隨其所利而令具足同利者常以大乘勸誨衆生復次施者所謂捨心愛語者行無限齊利行者畢竟不誨同利者迴向大乘復次施者起慈行捨愛語者不捨喜心利行者大悲莊嚴利於衆生同利者捨於高下發心迴向一切種智復次施者如法求財清淨行施愛語者將導愛者安止

善法利行者說於己利以利益他同利者令
諸衆生發一切智心復次施者捨於內外愛
語者功德智慧心無憊惜利行者捨自利行
而行利他同利者棄捨重位心初無悔復次
法施者如所聞法悉能演說愛語者不爲利
養而演說法利行者誨他諷誦心無疲厭同
利者一切智心所得妙法即以此法勸厲衆
生復次法施者若有衆生一一聽法次第爲
說而無錯謬愛語者爲人說法不辭遠近利
行者有求法人供給衣服飲食卧具病瘦醫
藥令無所乏旣施所安然後隨應而爲演說
同利者凡所讚說常勸衆生迴向阿耨多羅

三藐三菩提復次法施者於諸施中知其最
勝以此勝法爲人演說愛語者常爲利益衆
生故說利行者隨義而說不隨文字同利者
常爲具足佛法故說復次施者具足檀波羅
蜜愛語者具足尸羅羣提波羅蜜利行者具
足毗梨耶波羅蜜同利者具足禪那般若波
羅蜜復次施者初發菩提愛語者修行菩提
利行者不退菩提同利者一生補處復次施
者安住菩提種子根本愛語者滋長菩提芽
莖枝葉利行者漸以開敷生菩提華同利者
已能成就菩提果實舍利弗是名菩薩以四
攝法攝取衆生而不可盡

復次舍利弗菩薩摩訶薩四無礙智亦不可
盡云何為四一者義無礙二者法無礙三者
辭無礙四者樂說無礙云何義無礙於諸法
中知第一義是比智是因智是緣智是和合
智是不墮邊智是不任中智是十二因緣智
是不異法性智是如實智是實際智是覺空
空智是無相相智是無願願智是無為為智
是觀一相智是觀無我智是觀無衆生智是
觀無命智是觀無我第一義智是觀過去無
罣礙智是觀未來無有邊智是觀現在一切
種智是觀諸陰如怨賊智是觀諸界如毒蛇
智是觀諸入如空聚智是觀內法永寂滅智

是觀外法無行處智是觀所緣如幻化智是
觀念正任智是觀忍正法智是觀自身智是
觀了諸諦智是苦不和合智是集不作智是
滅自性智是道能到智是分別諸法智是觀
衆生諸根心行隨所入智是諸力無能伏智
是諸覺如實解智是禪定受持智是慧光明
智是幻化莊嚴智是熱時炎迷惑智是夢中
所欲智是響所緣智是鏡中像無去來智是
種種相無相智是柅離柅智是取生離生智
是聲聞乘從他聞智是緣覺乘觀十二緣智
是大乘具足一切善根智舍利弗是名菩薩
義無礙智又復義無礙者思一切法義何以

故是一切法無我衆生無命無人如無我衆
生無命無人即名爲義如命義者色等諸法
亦復如是是名義無礙又復義無礙者是無
任說是無盡說是得一切法說如是義無礙
者諸佛所許是真實義無別無異智慧分別
無有障礙是名菩薩義無礙智

舍利弗云何菩薩法無礙智若觀諸法所謂
善法不善法世法出世法可作法不可作法
有漏法無漏法有爲法無爲法黑法白法生
死法涅槃法是智法性平等是智菩提平等
是智性平等是名法無礙智又復法無礙者觀
於衆生多欲心行少欲心行初發欲心行欲

相心行現在所緣欲心行現在因緣欲心行
有衆生內有欲行外無欲行外有欲行內無
欲行有內外欲行有內外無欲行有色欲行
非聲香味觸有聲欲行非色香味觸有香欲
行非色聲味觸有味欲行非色聲香觸有觸
欲行非色聲香味入如是觀衆生諸欲行門
行欲行者二萬一千行慧行者二萬一千行癡
行者二萬一千行等分行者二萬一千觀如
是衆生八萬四千心之所行如實而知隨其
所應而爲說法舍利弗是名菩薩法無礙智
舍利弗云何菩薩辭無礙智於諸音聲悉觀
了知所謂天龍鬼神卍闍婆阿脩羅迦樓羅

緊那羅摩睺羅伽人非人如是言語文字音
聲悉皆能知如是五道雜類衆生隨其種類
一一音聲語言文字而爲說法是名辭無礙
智如是語法文字思惟覺了無礙是菩薩知
一語二語三語乃至多語男語女語非男女
語過去語未來語現在語知積一字至多字
語是名辭無礙智是辭無礙智說時無謬無
有滯礙妙語通暢所言審諦正直無麁所有
文辭具足莊嚴大衆聞者無不歡喜如是種
種微妙音聲深遠廣普莊嚴俗諦第一義諦
以智慧箭善射邪見是辭無礙諸佛所許能
令衆生皆得歡喜舍利弗是名菩薩辭無礙

智而不可盡

舍利弗云何菩薩樂說無礙智不可窮盡所說無礙所說不住所說速疾所說捷利如所問答無罣礙答無違逆答是相應答住忍力答依二諦答依施戒忍進定慧答依一切法章句而答依於念趣正勤如意根力覺道甚深義答依寂滅思惟答所謂樂說無礙智者若一切言語文字口所分別正直而答所謂一切禪定三摩跋提真諦智答辯暢三乘隨諸衆生一切心行如應而答所言巧妙非如啞羊強梁麁惡本暴調戲如是之語悉無復有所宣寂滅人所受用威德之言無諸纏縛

相應無違微妙柔軟無可譏呵聖人所讚如
佛世尊所教誨語梵音清徹一切悉聞是樂
說無礙智諸佛所許爲他衆生說微妙法聞
是法者得出世樂滅盡諸苦是名樂說無礙
智也舍利弗是名菩薩摩訶薩四無礙智而
不可盡

復次舍利弗菩薩摩訶薩有四種依法亦不可
盡何等爲四依義不依語依智不依識依了
義經不依不了義經依法不依人云何依義
不依語語者若入世法而有所說義者解出
世法無文字相語者若說布施調伏擁護義
者知施戒忍入於平等語者稱說生死義者

知生死無性語者說涅槃味義者知涅槃無性語者若說諸乘隨所安止義者善知諸乘入一相智門語者若說諸捨義者三種清淨語者說身口意受持淨戒功德威儀義者了身口意皆無所作而能護持一切淨戒語者若說忍辱斷除恚怒貢高憍慢義者了達諸法得無生忍語者若說勤行一切善根義者安住精進無有終始語者若說諸禪解脫三昧三摩跋提義者知滅盡定語者悉能聞持一切文字智慧根本義者知是慧義不可宣說語者說三十七助道之法義者正知修行諸助道法能證於果語者說苦集道諦義者

證於滅諦語者說無明根本乃至生緣老死
義者知無明滅乃至老死滅語者說助定慧
法義者明解脫智語者說貪恚癡義者解不
善根即是解脫語者說障礙法義者得無礙
解脫語者稱說三寶無量功德義者三寶功
德離欲法性同無爲相語者說從發心至坐
道場修集莊嚴菩提功德義者以一念慧覺
一切法舍利弗舉要言之能說八万四千法
聚是名爲語知諸文字不可宣說是名爲義
云何依智不依於識識者四識任處何等四
色識任處受想行識任處智者解了四識性
無所住識者若識地大水火風大智者識任

四大法性無別識者眼識色任耳鼻舌身意識法任智者內性寂滅外無所行了知識法無有憶想識者專取所緣思惟分別智者心無所緣不取相貌於諸法中無所希求識者行有爲法智者知無爲法識無所行無爲法性無有識知識者生任滅相智者無生任滅相舍利弗是名依智不依於識云何依了義經不依不了義經不了義經者分別修道了義經者不分別果不了義經者所作行業信有果報了義經者盡諸煩惱不了義經者呵諸煩惱了義經者讚白淨法不了義經者說生死苦惱了義經者讚生死涅槃一相無二

不了義經者讚說種種莊嚴文字了義經者
說甚深經難持難了不了義經者多為衆生
說罪福相令聞法者心生欣感了義經者凡
所演說必令聽者心得調伏不了義經者若
說我人衆生壽命養育士夫作者受者種種
文辭諸法無有施者受者而為他說有施有

受了義經者說空無相願無作無生無有我
人衆生壽命養育士夫作者受者常說無量
諸解脫門是名依了義經不依不了義經云
何依法不依於人人者攝取人見作者受者
法者解無人見作者受者人者凡夫善人信
行人法行人八人須陀洹人斯陀舍人阿那

含人阿羅漢人辟支佛人菩薩人一人出世
多所利益多人受樂憐愍世間生大悲心於
人天中多所饒潤所謂佛世尊如是等名佛
依世諦爲化衆生故作是說若有攝取如是
見者是謂依人如來爲化攝人見者故說依
法不依於人是法性者不變不易無作非作
無住不住一切平等亦平等不平等者亦
復平等無因無緣得正決定於一切法無別
無異性相無礙猶如虛空是名法性若有依
止是法性者終不復離一相之法入是門者
觀一切法同一法性是故說言依一切法不
依於人舍利弗是名菩薩摩訶薩四依無盡

無盡意甚 薩經卷第三

周

調動

作上正

掉

爽

字軟 勸

督

下音篤

一

頻感

上止

作

六反 攢眉

一

輕憊

下莫

虧

慙

下女


板

反

慙而

捷

利上才 業反



猪飼順良寄附

